

15 MAR 1996

Mahathir-kekayaan

KONSEP "ROBIN HOOD" TAK SESUAI DI MALAYSIA, KATA PM

KUCHING, 16 Mac (Bernama) -- Perdana Menteri Datuk Seri Dr Mahathir Mohamad hari ini menolak konsep "Robin Hood" di mana seseorang itu menyamun daripada yang kaya untuk diberikan kepada yang miskin kerana ini bererti seseorang itu memperbaiki nasib dirinya dengan menindas orang lain.

Beliau berkata walaupun rakyat negara ini digalakkan mengejar kemajuan, tetapi bukan dengan cara diskriminasi dan penindasan ke atas pihak tertentu semata-mata kerana ingin kononnya mempertahankan pihak yang dikatakan lemah.

"Konsep Robin Hood mungkin sesuai di zaman penindasan oleh 'the Sheriff of Nottingham' tetapi dalam zaman masyarakat bertamadun, berbudaya dan berundangan, konsep Robin Hood tidak sesuai lagi," katanya ketika merasmikan Persidangan Hakim-hakim di sini.

Perdana Menteri membuat rujukan kepada kisah Robin Hood sebagai memberi contoh di mana sesetengah keputusan mahkamah menyebabkan yang miskin mungkin menjadi mangsa akibat pampasan yang terlalu tinggi yang diberi oleh mahkamah, walaupun ini dianggap keadilan oleh mahkamah.

Beliau berkata akibat daripada pampasan yang tinggi misalnya dalam kes-kes tanah, ialah kenaikan kos sara hidup bagi masyarakat kerana yang membayar akhirnya bukan pengusaha pembangunan tanah tetapi pembeli atau penyewa bangunan.

Dr Mahathir berkata di mahkamah semua pihak patut mendapat keadilan iaitu pertimbangan dan hukuman yang waras dan saksama dan mahkamah bukannya tempat untuk sesiapa membuang geram, membalas dendam atau untuk menyamun yang kaya untuk diberi kepada yang miskin.

"Menyamun walaupun daripada yang kaya atau daripada Kerajaan adalah sama jenayahnya dengan menyamun daripada yang miskin.

" Kita tidak mahu melihat sesiapa menyamun sesiapa. Dalam masyarakat yang ideal tidak ada samun-menyamun. Tetapi jika ada, tindakan dan hukuman mestilah sama," kata Perdana Menteri kepada 75 hakim Mahkamah Persekutuan, Rayuan dan Tinggi yang menghadiri persidangan dua hari itu.

Beliau berkata di Barat keadilan bagi majoriti tidak dianggap penting lagi tetapi yang penting dan yang diutamakan ialah hak individu semata-mata.

Tetapi, di Malaysia, katanya, kerajaan berpendapat bahawa sementara hak individu perlu dilindungi, hak majoriti masyarakat juga perlu diberi pertimbangan yang seimbang.

" Bagi kita inilah keadilan. Sebarang penilaian yang berat sebelah kepada mana-mana pihak, miskin atau kaya, tidak boleh dianggap adil," katanya.

Dr Mahathir berkata bagi sesebuah negara membangun seperti Malaysia di mana urusan ekonomi amat penting, segala usaha untuk membendung peningkatan harga barangan dan khidmat, iaitu kos sara hidup, amatlah penting.

Ia mempunyai kaitan dengan kebahagiaan hidup semua rakyat, terutama yang miskin yang tentulah lebih ramai daripada rakyat yang kaya.

Individu dalam masyarakat boleh mencari kekayaan dan memperbaiki nasib tanpa merugikan masyarakat tetapi individu juga boleh mencari kekayaan dengan menganiaya dan merugikan masyarakat.

Beliau berkata walaupun konsep keadilan masyarakat Malaysia berbeza daripada konsep masyarakat maju di Barat, ini tidak bermakna Malaysia menolak semua cara dan pendapat Barat berkenaan keadilan.

Beliau memuji sistem yang teratur dalam menjalankan proses penghakiman

yang diamalkan oleh Barat yang disifatkannya sebagai amat baik dan perlu diterima.

Demikian juga susunan dan bentuk undang-undang, iaitu kodifikasi undang-undang amatlah baik bagi menyeragamkan undang-undang dan proses undang-undang supaya seberapa yang boleh persepsi dan pegangan seseorang hakim terhadap sesuatu perkara tidak terlalu mempengaruhi penghakiman.

Perdana Menteri berkata tidak ada sesiapa yang boleh menafikan bahawa penyeragaman dan penguatkuasaan undang-undang adalah baik dan lebih memungkinkan keadilan berlaku.

Beliau berkata cara menjalankan undang-undang syariaah di Malaysia mempunyai sistem dan peraturan-peraturan serta undang-undang yang disusun rapi walaupun terdapat kelemahan-kelemahan yang perlu diperbaiki dari semasa ke semasa.

"Kita tidak boleh tolak apa yang datang dari Barat kerana ianya datang dari Barat. Yang jernih tetap kita terima, yang keruh kita buang," kata beliau. -- Bernama.

AU AHH